

# Moutier perda la pazienza

Sis mais suenter la votaziun da zercladur

DA GUIU SOBIELA-CAANITZ

**■ Ils 18 da zercladur 2017 ha il suveran da Moutier/BE (1) tscherni cun 2067 vuschs cunter 1930 da far part dal chantun Giura. La confederaziun, il chantun Berna e las autoritads da Moutier avevan pinà minuziusamain il referendum communal en chausa.**

Adversaris dal Giura han tuttina inoltrà dusesch recurs cunter il resultat da la votaziun. Il prefect dal Giura bernais [a Courtelary] ha refusà trais da quels, ma n'ha anc betg tractà tshels nov. A la fin da november «ha il cussegl communal da Moutier scrit a presidenta federala Doris Leuthard, supplitgond d'intervegnir tar il chantun Berna per accelerar la midada da chantun. Las autoritads da la citad inculpavan la prefectura da tractar memia plaun ils recurs (...). Ellas menziunavan plinavant ina moziun da la pps dal Giura bernais en il cussegl grond, la quala veglia bloccar lezza midada. La moziun pretendeva ch'ins stritgia ils artitgels 138 e 139 da la constituziun giurassiana, relativs a la 'question jurassienne', e quai avant la ratificaziun d'ina cunvegna davart Moutier tranter ils dus chantuns. Il cussegl communal manegia ch'il chantun Berna, per motivs da finanzas, veglia mantegnair sia suveranità sur Moutier uschè ditg sco pussaivel» (2). La regenza chantunala ha lur annunzià immediat ch'ella haja entschavì a pinar la partenza da Moutier, malgrà ils nov recurs anc adina pendants. Ella veglia lura sut-tametter al cussegl grond la cunvegna relativa. «La regenza vul spetgar la decisiun da la prefectura dal Giura bernais

per discutir cun las autoritads dal chantun Giura» (3).

## La sfida dal cussegl grond bernais

Da l'autra vart ha lezza regenza «invité le parlement à accepter la motion» da la pps dal Giura bernais (Radio Jura bernois, 6 da december). Quai ha lura fatg il cussegl grond cun 117 vuschs cunter sis (sic!), pretendend che la cunvegna cun il chantun Giura davart Moutier entria en vigor mo sch'il pievel giurassian stritgia ils artitgels en dumonda da sia constituziun: «Lur preschientscha en la constituziun giurassiana offenda permanentamain il chantun Berna ed il pievel dal Giura bernais.» Sin quai, ils 10 da december, ha il parlament communal da Moutier vuschà ina resoluziun cun 28 vuschs cunter 13. «Ils sutscrits giavischan che la midada da chantun sa spleghia da Bumaun 2021, pia tenor il chantun Giura. La resoluziun (...) supplitgescha il cussegl federal da surveisar l'andament da la midada per evitar u limitar mintga tentativa da la bloccar. Ils sutscrits giavischan era che la regenza giurassiana e la bernaisa elavurian in plan per la partenza da Moutier. Pierre Roth (pcd), exponent da la resoluziun, (...) ha declerà: 'Las fadias duain esser coordinadas, spertas, planisadas e s'enclegia survegliadas da la confederaziun (...). I sa tracta da respectar la voluntad dal pievel'» («24 heures», 12 da december). Uschia la situaziun en l'advent 2017, sis mais suenter il referendum dals 18 da zercladur. Co va quai vinavant?

1. 7660 olmas, da quai 5513 svizras.

2. Gasetta «24 heures» (Losanna), 30 da november 2017.

3. Radio Jura bernois, prim da december 2017.